

PARAENETI

CON M. IOANNIS SA-

liceti quo iuuenes ad eloquentiae stu-
dia incitantur.

133



Prima rei laudes augent exordia natae
Si dignitate polleant.

Prudenti Iouis ex cerebro prognata Minerua
Artis docet cunabula.

Doctrinas domini caelestis munera ueras
Scriptura narrat Biblica.

Quas iubet infusae iuuenes industria mentis
Amare toto pectore.

Et praceptoris uox discere sedula mandat.
Et res parentis exigit.

Quo patriae possint altrici uiuere chari,
Suisque semper utiles.

Quos sibi conflato post ultima funera nomen
Lucentur aere firmitus.

Nam magna docti famam sapientia laude
A morte caeca uindicat.

Omnia sunt mortis, doctrinae sola triumphat
Labore parta gloria.

Poscite quapropter iuuenes cum lumine libros
Vitae magistros optima.

A cres ingenij uires intendite Musis:
Amate castra Palladis.

Quam fingit casto laudandam fabula uatum
Pudore docta uirginem.

Nam castos animos largitor possidet artis
Prudentiaeque spiritus.

Ingenij uires minuit Venus improba uiuos.
Et larga uini copia.

Has surda blandas Sirenas praeterit aure
Amator ingens artium.

Pallas cur galeam cristato uertice gestat,
Manuque portat Aegida?

Hos ut depellat toruos labor impiger hostes
Virtutis ardens praemia.

Impediunt studij ceptos praegrandia cursus
Exhausta Bacchi pocula.

Excudit e manibus doctos Cytherea libellos,
Viresque perdunt otia.

Has forti studij nascendi pectore pestes
Cursum morantes pellite.

Complures magno doctrinas protulit usu
Natura rerum multiplex,

Inter quas ars est sapienter maxima fandi
Summis amanda uiribus.

Quo possis rectos ad mores flectere uulgi
Supina crassi pectora.

Orphea narrarunt rapidos testudine lapsus
Tardasse grata fluminum.

Ista facundi poteris tu Rhetoris arte
Mouere corda ferrea.

Nam quid non poterit sermo prestare disertus?
Vox blanda mollit omnia.

Tempora quapropter iuuenes transmittite Musis
Sermone blandis mobili.

Non labor exanimet, uigilis patientia curae
Amica uincet omnia.

